

後漢紀

六



後漢紀孝獻皇帝卷第二十六

袁宏

初平元年春正月辛亥大赦天下侍中周越城門校尉伍瓊說董卓曰夫廢立事大非常人所及袁紹不達大體恐懼出奔非有他志也今購之急勢必爲變袁氏樹恩四世門生故吏徧於天下若收豪傑以聚徒衆英雄因之而起山東非公之有也不如赦之拜一郡守則紹喜於免罪必無患矣卓以爲然乃以紹爲渤海太守癸丑卓殺弘農王卓使郎中令王儒進酖於王曰服藥可以辟惡王曰我無疾是欲殺我爾不肯強之於是王與唐姬及宮人飲藥王自歌曰天道易兮運何艱棄萬乘兮退守藩逆臣見迫兮命不

延逝將去汝兮往幽玄唐姬起舞歌曰皇天崩兮后
土頽身爲帝王兮命夭摧死生異路兮從此乖悼我
斃獨兮心中哀因泣下坐者皆悲王謂唐姬曰卿故
王者妃勢不爲吏民妻矣自愛從此與卿辭遂飲藥
而死帝聞之降坐盡哀是時冀州刺史韓馥豫州刺
史孔伷兖州刺史劉岱陳留太守張邈渤海太守袁
紹東海太守喬瑁山陽太守袁遺河南太守王匡濟
北相鮑信後將軍袁術議郎曹操等並興義兵將以
誅卓衆各數萬人推紹爲盟主紹自號車騎將軍操
行奮武將軍長沙太守孫堅亦起兵誅卓比至南陽
衆數萬人卓以堅爲破虜將軍冀其和弭堅討卓逾

壯進屯陽人卓大怒遣胡軫呂布擊堅戰于建平堅
大破之卓以山東兵盛欲徙都關中召公卿議曰高
祖都關中十一世後漢中興東都洛陽從光武至今
復十二世案石苞室讖宜復還都長安百官無敢應
者司徒楊彪曰遷都改制天下大事皆當因民之心
隨時之宜昔盤庚五遷殷民胥怨故作三篇以曉諭
之往者王莽篡逆變亂五常更始赤眉之變焚燒長
安殘害百姓民人流亡百無一存光武受命更都洛
陽此其宜也方今建立聖主光隆漢祚而無故捐宗
廟宮殿棄先帝園陵百姓驚愕不解此意必糜沸蠆
聚以致擾亂石苞室讖妖邪之書豈可信用卓作色

曰楊公欲沮國家計邪關東黃巾作亂所在賊起長
安峻函險固國之重防又隴右取材木功夫不難杜
陵南山下有孝武帝故陶作甄處一朝一夕可辦宮
室官府盍何足言百姓小人何足與議若有前却以
我大兵驅之豈得自在百寮皆失色太尉黃琬曰此
大事楊公語得無可思乎司空荀爽曰相國豈樂遷
都邪今山東兵起非可一日禁也而關西尚靜故當
遷之以圖秦漢之勢也堅爭不止禍必有所歸吾不
爲也卓使有司奏免二公二月丁亥太尉黃琬司徒
楊彪策罷初卓用伍瓊周懿之議選天下名士馥等
既出皆舉兵圖卓卓以瓊恣賣已心怒之及議西遷

瓊慙固諫卓大怒曰君言當拔用善士卓從二君計不敢違天下心諸君到官舉兵相圖卓何相負遂斬瓊慙彪琬恐懼詣卓謝曰因小人戀舊非欲沮國事也請以不及爲受罪卓不勝當時之忿旣殺瓊慙旋亦悔之故表彪琬爲光祿大夫卓以河南尹朱雋爲太僕以爲已副雋不肯受因進曰國不宜遷必孤天下望成山東之釁臣不見其可也有司曰召見君受拜而君拒之不問從事而君陳之何也雋曰副相國至重非臣所堪遷都非計臣之所急也辭所不堪進其所急臣之宜也有司曰遷都之事初無此計也就有未露何所受聞雋曰相國董卓具爲臣說有司不

能屈於是朝之大臣及尚書郎華歆等皆稱焉由是
止不副卓卓愈恨之懼必爲卓所陷乃奔荊州光祿
勲趙謙爲太僕王允爲司徒守尚書令丁亥天子遷
都長安卓留屯洛陽盡焚宮室徙民長安壬辰白虹
貫日三月己巳車駕至長安遭赤眉之亂宮室焚盡
唯有高廟京兆府舍遂就都焉戊午卓殺太傅袁隗
及其三子是時袁紹屯河內陳留太守張邈兗州刺
史劉岱東郡太守喬瑁山陽太守袁遺屯酸棗後將
軍袁術屯南陽豫州刺史韓馥大會酸棗將盟諸州
郡更相推讓莫有肯先當廣陵功曹臧洪升壇操血
曰漢室不幸王綱失統賊臣董卓乘釁縱害禍加至

尊虐流百姓大懼淪喪社稷翦覆四海兗州刺史劉
岱豫州刺史孔伷陳留太守張邈東郡太守喬瑁廣
陵太守超等糾合義兵並赴國難凡我同盟齊心戮
力以致臣節殞首喪元必無二致有渝此盟俾墜其
命無克遺育皇天后土祖宗明靈實皆監之洪辭氣
慷慨涕泣橫下聞其言者雖卒伍廝養莫不激揚卓
兵強紹等莫敢先進曹操曰舉義兵誅暴亂今衆已
合諸君何疑後使董卓聞山東兵起倚王室之尊據
二周之險東向以臨天下雖以無道行之猶足以爲
患今焚燒宮室劫遷天子海內震動不知所歸此天
亡之時也一戰而天下定矣不可失也其引軍西戰

於滎陽操兵大敗是時青州刺史焦和亦起兵討卓
務及諸將西行不爲民人保鄣始濟河黃巾已入其
境青州殷實軍革和望寇奔北未嘗接風塵交旗鼓
也好卜筮信鬼神入見其人清談干霄出觀其政賞
罰靖亂州遂蕭條悉爲丘墟頃之和病卒袁紹使臧
洪領青州撫和民衆盜賊奔走紹歎其能徙爲東郡
太守夏四月以大司馬劉虞爲太傅尚書令王允奏
曰太史王立說孝經六隱事令朝廷行之消却災邪
有益聖躬詔曰聞王者當修德爾不聞孔子制孝經
有此而却邪者也允固奏請曰立學深厚此聖人祕
奧行之無損帝乃從之常以良日王允與王立入爲

帝誦孝經一章以文二竹簞盡九宮其上隨日時而
出入焉及允被害乃不復行也

袁宏曰神實聰明正直依人而行者也王者崇德殷
薦以爲饗天地可謂至矣若夫六隱之事非聖人之
道也匹夫且猶不可而況帝王之命乎五月司空荀
爽薨爽字慈明朗陵令淑之子也年十二太尉杜喬
師焉舉孝廉賢良黨事禁錮隱於海上又南匿漢濱
黨事解辟命交至有道博士徵皆不就獻帝初董卓
薦爽爲平原相未到官徵爲光祿勳至府三日遷司
空當是之時忠正者慷慨而懷道者深嘿爽旣解禍
於董卓之朝又旬日之間位極人臣君子以此譏之

初爽兄弟八人號曰八龍爽最有儒雅稱兄子或名重於世六月辛未光祿大夫种弗爲司空卓發洛陽諸陵及大臣冢墓壞洛陽城中鍾簠鑄以爲錢皆不成文更鑄五銖錢文章城郭不可把持於是貨輕而物貴穀一斛至數百萬遼東太守八孫度自號爲平州牧立漢世祖廟單于羌渠旣爲國人所殺其子孫於扶羅應立國人立須卜爲單于於扶羅詣闕訟會靈帝崩王室亂於扶羅將數千騎與白波賊寇冀州界百姓皆高壁清野抄掠少有所得欲歸國國人不受遂止河東

二年春正月辛丑大赦天下韓馥袁紹自稱大將軍

遣使推大司馬劉虞爲帝不聽復勸虞承制封拜又不聽然猶與紹連結二月丁丑相國董卓爲太師夏四月卓西入關卓使東中郎將董越屯澠池寧輯將軍段熲屯華陰中郎將牛輔屯安邑其餘中郎校尉布在諸縣不可勝紀以禦山東卓將至公卿以下迎之皆謁拜下卓不爲禮卓謂御史中丞皇甫嵩曰可以服未嵩曰安知明公乃至於是卓曰鴻鵠固有遠志但鷙雀自不知爾嵩曰昔與公俱爲鴻鵠但今日復變爲鳳皇爾卓乃大笑曰卿早服何得不拜卓旣爲太師復欲稱尚父以問左中郎將蔡邕邕曰昔武王受命太公爲太師輔佐周室以伐無道是以天下

尊之稱爲尚父今之功德誠爲巍巍宜須關東悉定
車駕西還爲後議之卓乃止於是卓乘金華青蓋車
時人號竿摩車言逼上也卓弟旻爲左將軍兄子璜
爲中軍校尉宗族內外並列朝廷呼召三臺尚書以
下皆詣卓府啓事然後得行築郿塢城與長安城等
積穀爲三十年儲云事成雄據天下不成守此足以
畢老嘗行郿塢公卿已下祖道於橫門外誘北降者
三百餘人於坐中先披其舌或斬其手或鑿其眼未
死偃轉杯按之間會者戰慄失匕箸卓飲食自若初
卓飲衛尉張溫乃使人誣溫與素術通謀笞殺之刑
罰殘酷愛憎相害冤死者數千人百姓嗷嗷道路歎

息孫堅自陽人入洛陽修復諸陵引軍還魯陽卓謂
長史劉艾曰關東諸將數敗矣無能爲也唯孫堅小
敢諸將軍慎之堅昔西征其計策略與人同無故從
諸袁兒終亦死爾艾曰堅用兵不如李傕郭汜堅前
舉羌戰於美陽殆死無能爲卓曰堅時將烏合兵且
戰有利鈍卿今論關東大勢爾亦終無所至但殺二
袁兒則天下自服矣建武初立宗廟於洛陽元帝之
於光武父之屬也故光武上繼元帝又立親廟於洛
陽祭祀而已不加名號光武崩以中興之主更爲起
廟上尊號曰世祖廟以元帝於光武爲禰故雖非宗
不毀也後遂爲常明帝遺詔無起寢廟藏主於世祖

廟更衣更衣者帝王入廟之便殿也孝章不敢違命
以更衣有小別上尊號曰顯宗章帝崩遺詔如先帝
故事和帝上尊號曰肅宗後帝遵承皆藏主於世祖
廟積多無別是後顯宗但爲陵寢之號和帝崩上尊
號曰穆宗殤帝崩鄧太后以尚嬰孩不列於廟就陵
寢祭之而已安帝殺大臣廢太子及崩無上祖宗之
奏以建武以來無毀者遂因陵號恭宗順帝崩上尊
號曰孝宗沖質帝皆年少早崩依殤帝故事桓帝崩
上尊號曰威宗靈帝崩而天下亂故未議祖宗之事
於是有司奏議宗廟迭毀左中郎將蔡邕議曰漢承
秦滅學之後宗廟之制不用周禮每帝即位輒立一

廟不止於七昭穆不定宗廟迭毀孝元皇帝時丞相
匡衡御史大夫貢禹始建斯議罷絀典禮孝文帝孝
武帝孝宣帝皆功德茂盛爲宗不毀初孝昭尊崇孝
武廟稱世宗中正大臣夏侯勝猶執異議不應爲宗
至孝宣皇帝議猶不定太僕王舜中壘校尉劉歆據
經傳義處不可毀上從其議古人據正重慎不敢私
其君父如此其至者也後遭王莽之亂光武皇帝受
命中興廟稱世祖孝明皇帝政叅文宣廟稱顯宗孝
章皇帝至孝蒸蒸仁恩博大廟稱肅宗比方前世得
禮之宜自此已下政事多繫權稱臣下嗣帝殷勤各
欲尊崇至親而臣下懦弱莫敢執正夏侯之議故遂

憊濫無有防限今聖朝遵復古禮以求厥中誠合事宜孝元皇帝世在第八武皇帝世在第九故元帝爲考廟尊而奉之孝明因循亦不敢毀元帝今於廟九世非宗親盡宜毀比惠昭成哀平帝五年而再殷祭孝安孝桓孝昭孝和孝靈在穆四時常陳孝和以下穆宗恭宗威宗之號皆宜省去以遵先典殊異祖宗不可參並之義從之

袁宏曰光武之繫元帝可謂正矣夫君臣父子名教之本也然則名教之作何爲者也蓋準天地之性求之自然之理擬議以制其名因循以弘其教辯物成器以通天下之務者也是以高下莫尚于天地故貴